

## Prestaziun sensaziunala d'Annina Tomaschett

Alla concorrenza da tir internaziunala dalla fin d'jamna a Pforzheim en Germania ha Annina Tomaschett da Trun contonschiu in niev record svizzer. Sur la distanza da 10 meters culla buis d'aria ha ella migliurau per 0,8 puncts il record che la campionesa olimpica Nina Christen haveva contonschiu avon dus onns.

Hans Huonder/FMR

632,9 puncts – quei ei il niev record svizzer sur la distanza da 10 meters che *Annina Tomaschett* (21) ha realisau. Quei record ha ella contonschiu cun buca meins che 57 muschas, vul dir siets cun 10,2 puncts e dapli. Aunc mai ha ina tiradura ni in tiradur svizzer sittau in aschi ault resultat en quella disciplina cun 60 siets sin peis. Sin damonda dalla FMR ha la tiradura sursilvana commentau suandontamein sia prestaziun: «Nus savein con bein che *Nina Christen* sietta, mo tuttina eis ei stau mia finamira da contonscher enzacu aunc in meglier resultat ch'ella. Che quei reusseschi denton gia ussa ei era per mei ina sorpresa.» Durent il tir a Pforzheim ha Annina Tomaschett sentiu ch'ella era sin via ad in fetg bien resultat: «Realisau ch'ei seigi in record svizzer hai jeu denton pér cura che miu trenader ha gratulau a mi.» Quei record havess schizun aunc saviu esser pli aults: «Jeu hai treis siets da 9,9. Els mudregian in tec.» Il record svizzer ei reussius ad Annina Tomaschett ella qualificaziun pil final. En quella ha ella battiu l'entira concorrenza internaziunala. El final cun otg tiraduras e tiradurs eis ella la fin finala daventada fetg buna tschunavla. La davosa fin d'jamna ha Annina Tomaschett era contonschiu a Pforzheim sco suletta Svizra il final cul caliber pign. En quel eis ella medemamein daventada tschunavla.

### Svilup cuntinuau

Dapi che Annina Tomaschett ha absolviu igl emprendissadi sco pictura e la scola da recruta, sededichescha ella professiunalmein al tir. Ella viva a Biel e ha leu cundiziuns da trenament optimalas. En ina moda e maniera fetg positiva ei la midada da trenader avon rodund miez onn semanifestada tier ella. Da niev ei *Torben Grimmel* siu trenader responsabel: «Ils davos meins hai jeu empriu bia niev. Jeu hai saviu far in svilup el tgau ed era ellas differentas posiziuns. Jeu sentevel ch'jeu hagi aunc potenzial da svilup ed ussa eis ei reussiu da far in pass decisiv anavon.» Ch'Annina Tomaschett ei il mument en ina eccellente fuorma muossa denton era sia ambiziun: «Jeu sentel ch'igl ei aunc dapli pusseivel.» Quest'jamna separticipescha ella alla concorrenza da tir internaziunala a Thun e silsunter suondan ils «Shooting Masters», pia concorrenzas naziunalas. Quellas decidan lu era per part davart la selecziun pil campinadi d'Europa ed il campinadi mundial dall'elita digl atun vegnent. Omisdus campinadis fussen per ella ils emprems tier l'elita. La concorrenza enteifer l'equipa naziunala seigi fetg gronda, ei drovi forsia cletg per saver sequalificar. Annina Tomaschett che sietta il secund onn tier l'elita ha denton aunc temps. E silla damonda, co ei seigi insumma tiels tiradurs d'elita pertuccont il schubergiar la buis di ella: «Quei ei adina ina buna fin dil trenament. Aschia sai jeu era tschentar giu e sai che tut ei fatg endretg.»